

25. september

Naalakkersuisut siulittaasuata ammaanermi oqalugiaataa

(Naalakkersuisut siulittaasuat)

Aallaqqaasiut:

Naalakkersuisut siulittaasuata ukiaanerani ammaalluni oqalugiaataa inuaqatigiit politikkikku ingerlatitaaneranni pigaartuusarpoq, taamaattumillu oqallisiginissaa tamanik qilanaarineqartarpoq.

Tamannali oqaaseqarfingilersinnagu Siumumiit aamma Partiit tikilluaqqorusuppavut neriuutigalugu ukiakkut ataatsimiinneq aningaasanut inatsimmik isumaqatigiinniarfiusussaq angusaqarfiusumik suleqatigiiffiulluni naammassilluarneqassasoq.

Taamatuttaarli Siumup inatsisartuni ilaasortaatitai sinnerlugin inatsisartunut Siulittaasunngooqgittoq Lars Emil Johansen pilluarit .

Nunatsinni ineriertorneq unitsitassaanani ingerlavooq aamma nunarsuup sinneranut niuernikkut periarfissanik nutaanik annerusumillu suleqateqarnissamik piumasaqaleriartorfiusoq, soorlu tamanna takugipput inatsisartut ukiakkut ataatsimiinnerata tallimannngornermi ammarneqarnerani nuummi umiarsualivik ammaanersiorneqarmat nunatsinnut minnerunngitsumillu niuernikkut annerusumik nunanik allanik suleqateqarnissamut ammaassisussaq atorluarneqaruni. RAL-illu ukiuni qaninnerni nunarsuup sinneranik usinik assartuinermik allannguiniarluni suliniuteqarnera nersualaartariaqarpoq niuernikkullu atorluarneqarnissaa inuussutissarsiorntunut iluaquataalluassasoq neriuutigaarput. Nalunngilarput suliniut pillugu assoraalisimaartitsiniarsarisqarmat pigaartumik ullumikkut pissusiusunik atuutsitsiinnarusuttunik, niuernikkut pigaartumik aalisakkat niuerutigineqarneranni qularnanngilaq ukiuni agersuni sunniuteqassammat nunatsinni annerusumik aningaasarsiorneq eqqarsaatigalugu.

Aasaq manna pingortitami alianaagisatsinni aamma pissutsit ilungersunarluiunnartunngorsinnaerat nalaapparput uummannap eqqaani ajunaarnersuaqarnerani, innuttaaqativut nunagisaminnik qimaguttariaqarsimapput nalullugu qaqlugu uterumaarnerlutik, uagullu inuaqatigiinni ikiqatigiinnermik anersaaqarluta minnerusumik annerusumillu ikuusimasorpassuit aamma qutsavigniarpavut, ajunaarnermillu nalaataqartut ilungersunartumik atugaqarneranni pisinnaasarput tamaat ikiutissaagut, neriuutigalugu pisut kingunerisaannik oqilisaqataasinnaalluta, taamatuttaarlu upalungaarsimasuutitat nersualaarlugillu qujaffigaavut suliap siornatigut nalaanneqarsimanaangisaannartup suliniarfialugu ataqtigliissarniarneqarnerani sulilluarsimanerannut.

Aningaasaqarniarneq

Tamatta ilisimalluarparput nunatsinni aningaasaqarneq eqqarsaatigalugu tulleriaarilluarta-riqarluta, aningaasarsiornikkullu periarfissavut annertusartariaqarivut assortuussutigisinnagananngilarput.

Nunatsinni aningaasatigut isaatitsiviusoq ataasinnaatillugu sunut tamanut aningaasaliissuteqarnissaq ajornarpoq, taamaattumillu aningaasarsiornikkut isaatitsinissamut periarfissat sukkanerusumik sulissutigisariaqarpavut, aatsitassarsiornikkut takornariaqartitsinikkut aamma minnerunngitsumik nunatsinni naliitsumik pisuussuterput imeq avammut tunisassiarissallugu sapiissuseqarnerusariaqarpugut.

Naalakkersuisut siulittaasuata oqalugiaatimini aningaasaqarnitsinni nunatsinni pitsasumik tunngavissaqartugut oqaatigisaa timitalersornerussagutsigu aningaasarsiornikkut periarfissat qulaani saqqummiussavut sukataarutiginerusariaqarput.

Upernaap ingerlanerani missingersuusiortarnermut inatsit inatsisartuni suliaraarput tamanna ukiut missingersuuteqarfiusut ilanngulligit oqimaaqtigiisitsinissamik piumasaqarfiuvoq malinneqassallunilu taamaattumik pingaaruteqarpoq aningaasanut inatsit isumaqatigiinniutgalugu periarfissiinissaq sapinngisamik amerlanerpaanik peqataaffigineqassappat, imaanngilarmi aningaasanut inatsisissaq taamaallaat naalakkersuisooqatigiit sunniuteqarfigissagaat isumaqatigiinniarnikkununa Partiit periarfissinneqarlutik peqataatinneqassasut, Siumumiit neriuutigaarput tamanna anguniarlugu partiinut tamanut isumaqatigiinniutginissaa aallartisarneqassasoq.

Aningaasaqarnikkut aamma annertusaassagutta pinngitsoorneqarsinnaangilaq iluarsaaq-qinnernik suliaqarnissaq ilinniartitaanikkut aningaasarsiornikkut suliffeqarnikkullu iluarsaaqqinnerit, pisortat ingerlatsinerannik aningaasartuutikillisaanerit, minnerunngitsumillu ingerlatsinermi kommuninut nussuineq aqutissaapput.

Naalakkersuisut siulittaasuata ammaalluni oqalugiaataani, soqutiginarluinnarpoq qulequtaq **Suliffissaaleqineq**, oqariartuutigineqarpoq suliffissaaleqineq appariartortoq aap ilumut appariartorpoq suliffissaaleqisummi ikilisimapput, aperiguttali ilumut suliffissaaleqisutut pisortani nalungisavut ilumut tamarmik sulilernissamut piareersimappat ?isumaqarpugut sulileriaannaasut pillugit nalunaarsuinerit aamma allatigut ikorfartoqqaarlugit sulilersinnaasut nalunaarsuuteqartariaqartut, pisariaqartitsinermi piviusumik matussutissaqassappat suliffissarsiortut suliffissani sulileriaannaasutut inisisimasut suliffissaaleqisut akornanni qanoq amerlatiginersut ilisimasariaqarparput, nalunnginnatsigu taakku akornanni ikorfartorneqaaqqaarlutik sulilersinnaasut amerlasaqisut, taakkumi piareersimanngillat allatigullu suliniarfingeqaqqartariaqarlutik, allatut oqaatigalugu suliffissarsiortunik nalunaarsuineq sukumiinerusariaqarpoq, assersuutigutsigu sooruna suliffissaaleqisut suli taama amerlatigialuartut suliffissuarni sulisussaaleqisoqartuaannartoq, ataqtigiiingitsoqarpoq qulaajartariaqartumik.

Majoriaq aqutigalugu ilinniartunik amerlisaaneq ajunngilluinnarpoq ilaatigummi atuarfimmiiit aniinnartartut ukiorpaaluit uninngasimallutik ullumikkut atuarnissamut aqutissiuunneqaramik periarfissaq atulersimavaat, aningaasanut inatsit takugutsigu ukiut missingersuuteqarfiusut ilanngulligit Majoriamut aningaasaliissutit qaffakkiartuinnartussaapput, soorunami suliniuteqaraanni suliniarfiusup pisariaqartinera aamma appariartulertussaassaaq, naalakkersuisulli takorloorpaat qaqqugu pisariaqartitsineq appariartortinnejalissanersoq? Erseqqissumik oqaatigisariaqarpoq aningaasat atorsinnaasat killeqarmata tulleriaarisaria-qarnermiippugut, maannakkut oqarsinnaasariaqarpugut meeqqat atuarfianniit ilinniarfinnut ingerlaqqiffiusunut ingerlaqqittarneq piaernerusumik anguneqartariaqarpoq. Inuiaqatigiit aaqqissugaanitsinni aningaasanik atuilluarnissaq pisariaqarmat.

Ilinniartitaaneq.

Siulliullugu naalakkersuisut suleqatigiissitaliamik pilersitsisimanerat tapersorsornarpoq tamannalu naalakkersuisut kissaataattut 2019-imi atuarfeqarnikkut ilinniartitaanikkullu iluarsaaqqinnissamik inassuteqaasiortussamik.

Neriutiginarpoq meeqqat atuarfiat aamma minnerunngitsumillu angajoqqaat perorsaanermillu suliallit peqataatinneqassasut aamma minnerunngitsumik ilinniartitsisut. Aamma meeqqat atuarfianni ajunngitsup tungaanut ingerlasoqarmat ajunngilluinnarpoq meeqqallu atuarfiat immikkut isiginiarneqarmat nuannaarutissaavoq, apeqqutigerusunnarporlu aningaasatigut amerliliinissamut meeqqat atuarfiannut tunngatillugu malitteqassanersoq naatsorsuutigineqassanersoq, aningaasanummi inatsit missingersuutit qiviaraanni tamanna sillimaffigineqanngimmat. imatullu

paasineqassanerpa inassuteqaasiortussat naammassippata tamanna aningaasatigut malitteqassanersoq nalilersorneqassasoq aatsaat.

Attaveqatigiinnermi angallannermilu aaqqissuussaaneq.

Tele Greenlandip atortulersuutitigut pitsangorsaanera assigiinngitsutigut kinguaatoor-fiusaraluartoq takusinnaalluarparput ineriertitsiniarluni attaveqaatitigut suliniuteqarneq, tamannalu naammagisimaarnarpooq.

Mittarfinnik Ilulissani Nuummi Qaqortumilu inerisaaniarneq aallartilluareersimammat iluarismaarnarpooq neriuutiginassaarlu suliniutaasut pimoorunneqarlutik kinguarsarneqaratik naammassiniarneqarumaartut. Aningaasatigut takornariaqarneq annertuumik isumalluutaavoq tamannali aningaasaliinerunikkut matussuserniarneqarpoq, minnerunngitsumik nunap iluani angallanneq ataqtiginerusoq aaqtissiuunneqassapat aamma aningaasatigut atuinerusoqaraluarluni sanaartornerit nalaanni siunissaq ungasinnerusumut aningaasaliine-russaaq.

Aalisarneq Piniarneq.

Aalisarneq eqqarsaatigalugu aalisarnermut inatsit sulissutigalugu aallartinniarneqartoq siusinnerusukkulli kaammattuutigisarsimavarput tamatumali suliarineqarnerani kattuffiit susassaqartullu peqataatinneqarnissaat pingaaruteqarluinnartutut Siumumiit isigaarput, ersarissumilli una oqaatigisariaqarpoq, inuiaqatigiit pisuussutit pigaat, pigiuassallugillu.

Matumanili aaqqissuussiniarnermi peqqissaartumik sulissutiginissaa saneqqunneqarsin-naangilaq, kattuffiit aamma peqataatinneqassapput nalilersuinerilu aamma suliaqarnermi ilanngullugit nalidersorneqassapput. Asersuutitut tigugutsigu aalisarnermut inatsit maannakkut atuuttoq malillugu ESU-tut aaqqissuussineq qimanneqarsimavoq, umiarsuaatillit Bankit aaqtigalugit ilaatigut nutarterinernik suliaqarsimapput pisassat inatsit maanna atuuttoq malillugu qularnaveeqquaasinnaanerat atorlugu nutarterismallutik, sukkavallaamik pisussaaffik eqikkarneqarpat akiligassaq soorunami atukkiisut tigujumassavaat ukiunullu killilinnut periarfissiissutaassappat akiligassaq artukkiisinhaavoq inuiaqatigiinnullu aningaasaqarnikut sunniuteqarnerlussinnaavoq, taamaattumik mianerisassat naliersoqqissaagassallu tamanut paaseqatigiiffiusumik mianeralugit inatsisissaq suliarineqassasoq tamanut kaammattuutigineqartariaqarpoq.

Nunarput tamaat eqqarsaatigalugu sinerissap qanittuani aalisarneq Naalakkersuisut siulittaasuata ammaalluni oqalugiaataani maqaasinarpooq, avanna aamma minnerunngitsumik Diskobugti annerusumik eqqartorneqarmata.

Periarfissaq iluatsillugu tunumi aalisarnikkut periarfissat sulissutiginerat sumut killinnersoq apeqqutigissallugu pitsaasaaq, nalunngilarpummi tunu eqqarsaatigalugu siusinnerusukkut tusagassiutitigut tusartaratsigu suliniuteqartoqartoq.

Eqqaamaneqassaaq pingortitap pissusilersornermini pisuussutini aquppai aamma aalisakkat eqqarsaatigalugit, ilisimavarput sarfap kissartup atuunnerani saarulliit takkusimaaleriartormata aamma minnerunngitsumik avannaani ilatigullu qaleralinniat ilaat saarullinniarnermut ikaarsaarsimammata taamaattumik oqimaaqatigiissaarisumik oqallittarnissaq aamma pingaaruteqarpoq nungulerneeraaginnarani, aamma imartarsuarput ima angitigaaq ilaaluunniit suli atornatigu, aammalu qaleralinniarfiit eqqarsaatigalugit nalilersuinermi piffit, soorlu assersuut qeqertarsuup tunuani aalisarfik, ima apererusunnarsinnaagaluarpoq alisarfimmi sorlermi pisut pippat, ilaatigummi oqaatsinik atuinitssini paasiuminaatsut pilersissinnaasarpavut.

Ukiuni arlalinngortuni ilaatigut tusartarpavut apparpassuit toqoraannartut, pingortitap pisussusilersornermini uumasut aquppai, atortorissaaleriartornittali aamma tamanna

sakkortusarsinnaasarpaa, naalakkersuisunulli kaamattutiginarpoq pingortitap uumasui pillugit ulluinnarni atuisunik suleqateqarneq nukitorsarneqassasoq pimoorullugu suliareqqullugu, ilisimavarpummi atuisuusut nalunnginnerpaammassuk inuuniarfisartik tassanilu piniarneqarsinnaasut, umasuleritut atuisullu suleqatigiinnissaat pingaarutilerujussuuvoq. Ajoraluartumilli ilaatigut aalajangiisoqartapoq naapertuutinngilluinnartunik aamma naalakkersuinikkut.

Assersuutigalugu qilalukkut qernertat eqqarsaatigalugit ukioq maannamut Kangersuatsiarmiut aamma Upernivik Kujallermiut qernertanik qilalugartassineqarput Uummannap sulluani, kialluunniit nalunninngitsup ilisimavaa pigaartumik ukiakkut tamanna ajornaatsuinnaassanngitsoq piffimmimi pineqartoq isorartoqaaq, ajornanngitsumik upernaakkut aamma ukiakkut piffimmipi assinneqartut najugaqarfisa eqqaanni piniartinneqarsinnaagaluarpuit, taamaattumik naalakkersuinikkut ilaatigut naapertuutinngitsumik aalajangiisoqartarnera paasiuminaattaqaaq, kommunillu aalajangiisinnaatitaanatik qulaani assersuutigisanni.

Pinngortitaq avatangiisillu

Avatangiisitta mianerineqarnissaa naalakkersuisut erseqqissarmassuk suliniuteqarlutillu tapersorsornaqaat. Tamannami isorliunerusut nunaqarfiillu ilaanni ajornartorsiutaavoq ilaatigut ineriartortsivissat namminersorlutik oqartussat aningaasaligassaasa aningaas-lersorneqannginnerannik ilaatigut tungaveqarmat, tamaammat apeqquutigissavara aningaa-saliinerusoqarnissaanut suliniuteqartoqarnersoq. Ilaatigummi eqqaavissuit pilersaarusrusiorfiusunut akuerisaasunut nuunneqarnerisigut ajornartorsiutaasut aaqqiivigineqarsinnaammata neriuutiginarporlu timitalersorneqassasoq. Taamaalilluta avatangiisitta mianerineqarnissaanut aamma timitalimmik aqqutissiuussisoqassamat.

Amerikarmiut sakkutooqarfigisimasaanni mingutsitaat salinniarneqarnerat tusarluarnarpoq, aningaasaliissutaasullu pisariaqartitsinermut naammattut anguniarneqassasut kaammattuutigissavarput.

Isumaginninnermut tunngasut

Naalakkersuisut siulittaasuata ammaalluni oqalugiaataani isumaginninnermut suliniutit ukiaq manna inatsisiliorneqartussat saqqummiussai, aningaasanut inatsit aqqutigalugu suliarineqartussaammata naatsorsuutigaarpuit oqaluuserisassat saqqummiunneqarfifiinersarinnerusumik isummersorfigumaarlutigit.

Taamaattorli meeitat angajoqqaarsiaasa ajunngitsorsiaqarnerannut tunngatillugu upernaaq inatsisartuni aalajangiunneqartoq ajunngitsorsiat qaffaaffigineqarnissaat saqqummiutilesaарneqarnersoq apeqquutigissavarput, kissaatigissallugulu aalajangerneqarneratut qaffaanissamut aningaasaliisoqassasoq.

Uumap qinigaaffiup ingerlanerani meeqqanut tunngasut erloqinartut meeqqat illersuisuata saqqummiuttarpai, annertuunik meeqqat illersuisuatu uparuaassuteqartarsimavoq pisinnaatitaaffinnut sanilliullugit atortinneqartut naammaginanginnerat pillugu, tamanna kinguneqarpoq kommunit qanimat suleqatigalugit ilorraap tungaanut aalloriartoqarmat, taamaattumik meeqqat illersuisuatu qutsavigaarpuit kinguneqarluartumik suliniuteqarneranut aammalu naalakkersuisut kommunillu pisussaaffimminik naammassinninniarlutik ilungersorlutik suleqataanerat takulluarnarmat.

Kommunit

Kommunit killeqarfii allanngortinneqarput tassa kommunit sisamaasimasut tallimanngor-tinneqarmata. Qaasuitsup kommuuniata marlunngorluni avinnejnareratigut.

Kommuninut tapiissutit eqqarsaatigalugit isumaqatigiinniarnerit aqqutigalugit kommuuniuersunut naammaginartumik isumaqatigiinniartoqarnissaa pingaaruteqarpoq kaammattutigissavarpullu,

inatsisitigut aaqqissuussinissani eqqaamaqqussavarput innuttaasut sullinneqarnerisa pitsaanerulernissaasa pingartinneqarnissaa, ilangullugu eqqarsaatigalugu pisariitsumik eqaatsumillu sullissinerit ingerlanneqarsinnaasunngorlugit akisussaafflersuisoqassappat inatsisiliassaq tapersorsornarmat.

Namminiilivinneq.

Namminiilivinnissaq sulissutigalugu ingerlanneqarpoq. Tunngaviusumik inatsisiliornissamut Ataatsimiititaliarsuaq 2017-imi upernaakkut pilersinnejarniq. Siumumiit pingartipparput Ataatsimiititaliarsuup sulinissaminut periarfissarissaarnissaa, aammalu sapinngisamik allaffissornikkut akimmisaarfeqarani suliassaminik ingerlatsisinnaanissaminut periarfissinneqarnissaa.

Taamaattumik Siumumiit kaammattutigissuarput Ataatsimiititaliarsuup siulittaasuata allamik suliaqarnani siulittaasutut sulilersinnissaata aningaasatigut aaqqiivigineqarnissaa naalakkersuisunut suliareqqullugu, taamaalluni siulittaasup allanik pisussaaffinnik aporfearani tungaviusumik inatsisisap Ataatsimiititaliarsuarmit suliarineqarnerani siuttusinnaaqqullugu. Aammalu Siumumiit neriuutigilluinnarpalput Ataatsimiititaliarsuup suliaminiq ingerlatsinermi inuttaasunik peqataasitsinissaata naammattumik aningaasaliiffiginissaa qularnaarneqarumaartoq.

Nunanut allanut tunngasut

Naalakkersuisut siulittaasuata oqalugiaataani nunat allanut tunngatillugu suliat ingerlanneqartut qjaruppavut, kisianni illersornissamut sillimaniarnermullu tunngatillugu Danmark-ip USA-p Nunattalukornanni pissutsit ukiuni kingullerni annertuumik toqqissiviiliutaasut pilligit Naalakkersuisut sunik aaqqiissutaasinnaasunik suliniuteqarnerat paaserusunnarpoq, tassami pingaaruteqarluinnarmat Nunatta illersornissakkut sillimaniarnikullu nammineq soqtigisaasa nunatsinnit nammineq nunanut allanut minnerungitsumik USA-mut isumaatigiinnutigineqartarnissaat. Siumumiit Naalakkersuisunut kaammattutigissuarput Nunanut allanut allaffeqarfiup nukitorsarneratigut, Illersornissamut sillimaniarnermullu tunngasutigut tunngavigisatta nalilorsorluaqqissaarnissaat suliniutigeqqullugu. Tassami taamaaliorluarnissaq pisariaqarmat aammalu tamanna tunngaviusumik inatsisiliornermi avaqqunneqarsinnaanngitsut ilagimmassuk.

Naalakkersuisut siulittaasuata oqalugiaataa sulianik annertuumik paasissutissiisoq aamma tusarluarnartunik imaqratoq Siumumiit qujassutigaarput. Suliassarpasvuillu taakkartorneqartut aamma inuiaqatigiinnut pingaaruteqarluinnartut sapinngisarpat naapertorlugu suleqataaffigumaarpavut.

Qujanaq - Oqallilluarisi.

Jens Immanuelsen
Siumut